

BIBLIOTEKA  
SHTETIT

8JH-1

P 33

MYSLIM PASHA

Mallakastraj

POEME



854-1  
          
P33.

MYSLIM PASHA

# MALLAKASTRA

P o e m ë

LIBRERIA E SHTETIT

PRISHTINE

1957

36214

SHTËPIA BOTUESE «NAIM FRASHËRI»

## NË VEND TË PARATHËNIES

*Atëherë unë isha vetëm pesë vjeç. Nën rrapat e moçëm të Poçemit bëhej festë. Babai më ngrinte mbi supe dhe unë, duke prekur degët e rrapave, dëgjoja si fliste shoku Enver në tribunë. Kujtohej besëlidhja e korrikut të 1943-shit në Poçem.*

*... Kaluan vite dhe unë u rrita, por ai mëngjes korriku nuk do të përsëritet më. I ndjej ato brohorima të largëta sa herë marr rrugën e dashur mes gurëve të bardhë prej Kremenarit në Poçem.*

*Në atë përvjetor lindi dhe kënga:*



## I

Më thirrën brigjet me makje të gjelbëra,  
ku çeturi me dhallë  
qëndron në buzët e zhuritura të stinës,  
ku nën krisma e marshime  
brodhën dikur baballarët,  
grisur nga teli i opingës.

Më thirrën pranë kërrabës së bushit,  
pranë varrezave të dëshmorëve  
ku skuqin flamujt;  
pranë shkollarëve që varen mëhallave,  
pranë dyfekëve, korijeve, arave...

Më thirrën një ditë brigjet  
me makje të gjelbëra  
veshur  
në festën e çlirimit.  
Unë ecja dorë për dore me

Myqerem Ademin...

duke malaksur vendlindjen  
me qumështin e poemës nga vedër e dëllinjte...

## II

... Nata rreth e rrotull psherëtin.  
Nëpër gryka mullinjsh  
nata ha mërzhitinë...  
Dhe në qiellin e saj  
fustanellë e Arianit Topisë  
lëviz si diell.

## III

Ecën Mallakastra,  
ha hekur me dhëmbë.  
Qëmton lakrat në murishte,  
se balta rrit grurin e pakët  
dhe nënat thërrasin të ngjethura:  
«Oh, ç'u mbarove, farmak!»

Mbas lotve në rrugë e djerrina,  
kala e Gradishtës përtypte legjenda  
dhe u thërriste pranverave të vinin.

Vinte pranvera.  
Po vinte dhe hasmi.  
Ikte një armik  
dhe vinte një tjetër.  
Mes grykave,  
nën armët e nxehta,  
shtegtonin karvanet e gjymtuara.

Dhe duart e grisura, të rjepura,  
duke bredhur në brazat e ugareve  
duhej të hapnin burime,  
ku të lagnim buzën e tharë,  
larg yrteve të shtruara të agallarëve.  
Pastaj me gunën e dhirtë  
shtegtoje mbi vuajtjet e grindjet...

Ku do të shkoje kështu?  
Në cilën rrugë priste Rrapo Hekali?  
Në cilin kuvend thërriste Gjoleka?  
Portave të tua nga jugu në veri  
tytat e pushkëve të nxehta.

Dhe dera e Rrapos ka ngelur çelë.  
Në odën e tij të lashtë si në saksi  
bisqet e këngës janë mbjellë...



Fryjnë erërat e Gradishtës  
mbi krahët e turtujve, pëllumbave.  
Krahët e turtujve dhe pëllumbave,  
mbi kufomat e treqind burrave.

Kapedan Rrapo!  
Ç'janë ata zinxhirë?  
Dhembja e ngarkuar mbi brigjet  
vjen pas.  
Greshica u skuq.  
Fluturuan pëllumbat  
nëpër ditët e murrme të fukarasë...

Dritaret e horizontit grinden.  
Nometë e çobanëve nëpër dridhje.  
Jatagani i Rrapos  
shkëlqen nën degët e ullinjve.

— Hej! Mallakastër e sipërme,  
që vrave goxha Isuf be,  
ç'dashke vënë në batare! —  
çirret pashai qimezi  
nën një qiell me re...

Dhe shamitë e zeza të nënave  
lëkunden prapa zinxhirëve

si retë e dimrit të ashpër.  
U lagin ballin  
niperve...

Parmendat na ngrinë në duar,  
parmendat me dru hilqe punuar.  
Blerimet vështronin nëpër pranvera  
dhe ne përherë të menduar.

Duhej të rridhte djersë,  
si ujërat e Mullirit të Kashtës  
që të gatuanim një harapash të shkretës,  
që të radhisnim në kamare fishekët...

Ç'është kështu?

Si je pleksur, moj botë terse?  
Thërmojmë plisat e vakët në lehë  
sikur të gjenim rrënjët e jetës...

Dhe Xhemal Aranitasi  
hante nga varfëria jonë qejfet,  
kur fshatarët e sertë  
numëronin vdekjet...



Se na i blenë arat agallarët,  
po s'na e blenë jetën.  
Në krahë hodhëm trastën e dhirtë  
e u nisëm!  
në të përpjetat e fatit të shkretë...

Ku t'ia kërkonim rrënjët botës?  
Sa herë udhëve do t'u binim kryq e tërthor?  
Sa herë do të përfyteshim me spiunë e sejmënë  
që të shihnim qiellin e Mallakastrës sonë?

Ik e kthehu sërish,  
si zogjtë që kërkojnë foletë mes blirit.  
Fëmijët që lindëm,  
grisur nga përrallet,  
i rritnin puthjet tona të ngrohta  
dhe kafshata e misërt...

#### IV

Kur na i shpoi brinjët  
me gjilpërën e helmatisur?  
Gjymtyrët i lëvizëm në buzë të Margëlliçit,  
ku çadrat e teknikëve të huaj  
u ngritën mbi dhenë e vidhisur.

Dritaret e tokës nëpër gjurma hapeshin,  
dhe sytë e botës shikonin.  
Piketatat priteshin  
dhe instrumentët trasonin udhën e maqinave,  
duke prerë shpirtin e krahinës...

Dhe prisnim fatin e bardhë,  
si në përrallat e vjetra,  
të na e sillte kjo rrugë,  
që e hapte botorja.  
Ku e dinim se mbreti kodosh  
bënte pazare...  
dhe hapësirat shqiptare përdorte si lodra.  
Shpirt, që na dhemb shumë!  
Ç'është kjo?  
Udhë maqinash apo gjarpër,  
që na kafshon brinjët?  
Inxhinierët fashistë, duke parë projektet,  
mendnin për ushtritë e Musolinit.

Kështu përditë  
rrudhat na thelloheshin nga mendimi  
e bëheshin lugina.  
Gjyshet tona i hante meraku  
se mos na prishej bukuria.

## V

Dhe ti i buzëqeshje diellit, Mallakastër,  
nëpër këto burime dëshpërimi,  
duke u grushtuar me Bektash Cakranin,  
që ngrinte nëpër vitet e gjata  
sarajet e larta.

.....

## VI

Kalojnë ditët mbi nometë e Përroit të Thatë,  
duke prekur me gishtërinjtë e mjegullt çobanët.

Çobanët mbanin kërrabat,  
dhe tallaganet e grisura,  
kurse kopetë ishin të agallarëve.

Bota copa-copa  
vinte tek kafeneja e Symizës.  
Maqina e miellit «Made in Italia»  
bluante hokrrin e yrteve.  
Kollaroja e ndritur e Idrizit  
ia shtonte fukarasë dertet.

Idriz agai mbolli komunën dhe postkomandën,  
mbolli kërbaçin dhe taksidarët.



Idriz agai na mbolli dhe drurë  
që të çelnin lule të bardha.  
E ne të deheshim për «lulëzimin»,  
duke ngritur dolli nëpër dasma.

Moj tokë e gurtë!  
Nën yllin e karvanit  
ç'llafosje me rrënjët e drurëve?  
Ti, që rrite dafinën e ullirin,  
nuk doje lulet e agait  
mes baltës së kuqe të gurëve.  
Ç'kanë tyrbet  
që shikojnë guake?

Të ngritura nga dërrasat e Përroit të Zi  
si kukudhët e ëndrrave,  
herë qeshnin, herë qanin  
dhe çaheshin,  
dhe bënin «dua» përsëri.

Ç'kanë dervishët?  
Dervishët nën dhëmbë  
shanin rrufjanët e këndonin kuranë.  
Me çetur në Kapaj hahej hashri  
dhe në arat e Kremenarit  
shponte qetë hosteni i frashrit.

Kështu kishe mbetur  
mbrëmjeve, mëngjeseve,  
Në prag të botës prisje lindjen  
dhe nuk harroje të vadisje  
një rrënjë trëndafili...  
Dega e prerë çon bisqe në pranverë.  
Plagët me këmishë lidhur  
do përthahen rrugës nëpër erë?

## VII

Vër veshin e dëgjo!  
Kapërce rrugën e yjve të tu  
dhe ngrohu pastaj në qiellin e Spanjës.  
Nën shinë yjor të copëtuar në Ebro  
thërret yt bir: «Jam këtu!»

Atij si një zjarr i shfaqej Shqipëria,  
atje ku ngjyhej buka me kripë,  
ku mbi strallin e udhëve  
pikonte djersë varfëria...  
«Ebro-Vjosë», ç'm'i trazove mendimet e mia...  
Kaq larg në hark të paralelit  
lumenjtë përqafohen.  
Ç'valle të madhe paska liria!

Vër veshin e dëgjo!  
Dinamiti hedh gurët drejt qiellit,  
ndërsa gurët e Mallakastrës  
rrinë të menduar.  
Vringëllima zinxhirësh  
në duar të Dervishit  
që e marrin xhandarët e zinj.  
Ulërima e maqinës së burgut  
fluturon e ngjethur  
nga rruga në rrugë,  
nga brinja në brinjë

Ata do të takohen një ditë,  
pulsin e ndjen.  
«Dalngadalë po vjen behari,  
dalngadalë po na vjen».

## VIII

Ditë të hidhura pushtimi,  
pemë të shtrembra mbillte fashizmi.  
«Korba, moj verë!»  
thoshte pranvera.



Ç'na u copëtua flamuri një natë!  
Flamuri në komunën e Ballshit që nxirë,  
që prerë me sëpatë...

## IX

Retë vraponin mbi brigjet,  
sikur donin të transmetonin lajmin e shpejtë,  
Ato po shkelnin tokën e vendlindjes  
me hejbet e mbushura  
plot ilaçe dhe jetë.

Mërdhinin kasollet  
dhe vështronin nga njëra-tjetra.  
Era nuk pushonte alarmin  
nëpër hatullat e vjetra.

Vinin-komunistët me torbat plot libra  
nëpër natën krahinore,  
mbështjellë në ëndrra të mira...

Viti 42! Viti 42!  
Vërshtëllen këngën e zgjimit.  
Ëndërrimi i vegjëlisë

kalonte hijen e kërrabës së dhive  
tej arave të gërryera në brinja,  
ëndërrimi krahët ç'paska ngritur,  
drejt botës të ndritur!

Vjeshta thirri pranverën mbi Vjosë.  
Vjosa thirri Mehmetin në brigje.  
Belxhiku i tij thirri qiellin në grykë  
dhe argatët

me duart e ngrira.

Shqipëria këndonte:

«Digje, Mallakastër, digje!»

Në portat e shtëpive  
hynë letrat me emrin «Vjosë»  
dhe u vaditën arat e pambjella.  
Në mendimin e lagjeve të përgjumura  
rrodhi «Vjosa»  
dhe ata mbushën bucelat  
me ujin e kulluar të burimit.

Ra një çast qetësia...

Dhe fshatarët patën një vështrim pus të thellë.

More vëlla,

qysh është ky komunizmi,

në ç'ara duhet mbjellë?

LISTERA E BH  
SHKOKAS  
65001

36211

Pastaj mbinë ilegalët si trëndafilë.  
Në Guroret e bardha te Dervişi,  
lindën buzëqeshjet si fluturza bore.  
Pas çantës të liceistit Ramiz,  
harronin gjumin diku skraparlinjtë.  
Dhe frynte erë vazhdimisht...

Të gjithë e mbajmë mend  
kur na përqeshën nga sarajet,  
kur na thanë: «Çunakër».  
Në ndërrim të stinës së vjeshtës  
hyri dimri te Besim Belishova.

Përballë pasanikët  
e majmë,  
armiq të dytë,  
armiq të tretë  
përballë.  
Kurse ne nxirrnim  
këmishët,  
shamitë e kuqe,  
fishekët  
nga bahçja e së ardhmes.  
Dhe thirrën komunistët:  
«Për luftën e klasës...»



Qetësia qe thyer.  
Fletëthirrje të kuqe  
u vinin fukarenjve në dyer.  
Dhe ata në të largëtat shtegtime  
hanin bukë të misërt  
dhe binin në luftime.

Për herë të parë  
për fukarenjtë u bë një pritje.  
Në gëzimin e krahinës  
dikush do të lindte...

Mushka xanxare e agallarëve,  
në kafkë kish dhembje.  
Plagë e rëndë e ligë!  
Në sofatet e nënprefekturës,  
në zyrat fashiste.

Dikush do të lindte.  
Acaret e shkurtit këputeshin mezhdave  
tek binin yj të rinj.

Ata ishin si krushq,  
që s'hipën mbi kuaj.  
por mbi shpinë të idealeve,  
të gjashtëdhjetë.

Me duart e tyre po mbillnin  
grurin e drejtësisë,  
grurin e lirisë  
nën gjurmët e korrierëve të shpejtë.

Ku do të dëgjoheshin krismat e para  
si fjalët e para të fëmijës së lindur?  
Në qafë të Sykuqit  
pas mëngjeseve, mbrëmjeve,  
pas klithmës së shpendëve  
do ngrihej era e barutit.

«Jarabi» thanë nënat turqisht,  
dhe nxorën trastat nga katonjtë e odave.  
Me djemtë e vegjël nisën ballët e parë të fi-  
shekëve.

Kurse «paria» e fshehur-  
tek oda e Besimit  
nëpër djersë heshtte.  
Efendilerë!  
Greshica po digjet.  
Ç'është kjo vdekje?..

Dhe pushka jonë qëllonte  
e egër, hakmarrëse mbi fashistët.

Ata lëpinin lëngun në gishtat  
e hiqeshin zvarrë si krimbat...

## X

Ku pushuan partizanët e parë,  
asaj nate shkurti plot dridhma?  
Mbi kondakët e pushkëve të gjata  
gjumi në qepalla ra nga dalë.  
Kazermave sërish përgjonte nata...

Ëndrrat u derdhën.  
Me vrap harbuan  
si në gjolle dhitë lara-lara.  
Mbinë si në pranverë lulet,  
ditë të bukura, të ndritura,  
të bardha.  
Dhe u ngritën prapë në mëngjes,  
rrugët gjapëronin nga çdo prag.  
Shkonin luftës së ashpër të bashkuar  
partizanët e çetës «Plakë».

## XI

Përkrah shokëve ecën anës Vjosës,  
ai që luginat e Ebros pa.



Këpucët me qafa atij i janë shqepur,  
dyfekun të markës së vjetër e mban...  
Dhe lagjet e Çorrushit nën kashtë dremisin,  
dhe nuk kanë kohë ta takojnë përherë.  
Ai midis patickave hedh brigjet...  
Në grykat e Çorrushit fryn erë.

Përkrah shokëve ecën anës Vjosës.  
Nga tenda e qiellit pikon serë e zezë.  
Ku paska shkuar serë e Selenicës?  
Nën borën e dendur evropiane,  
serë e Selenicës erë gjak,  
serë e Selenicës erë djersë.

Dhe nisën për në port të Vlorës,  
fuçitë në dekovilin si udhë milingonash  
nga pas Mallakastra jonë thatime  
po hesht e po përgjon.  
Ç'ta gërryen shpirtin shoqëritë e huaja,  
o Selenicë e dobët e mërdhirë,  
o Selenicë, o motër e mjerë!  
Zbraz çeta bataretë përmbi kazerma  
dhe dielli del i madh mbi minierë...

## XII

Në udhët e sapoçelura  
mjegulla binte e përgjumur.  
Po udhët kishin sy  
dhe traga s'duhej humbur.

Nga të kalonim?  
Nëpër figura të çuditshme, të zeza  
yshteshin dredhitë e tradhtarëve.  
Ndrinin filxhanët persianë të kafeve  
në sarajet e agallarëve...

Nga të kalonim?  
Revolucioni qenka koskë e fortë.

Dhe ne do të çoheshim  
një mëngjes, pa gdhirë.  
që të përshëndetnim Afërditën.  
Ne do të ktheheshim  
një mëngjes pa gdhirë.  
që me mall të zbrisnim Afërditën.

Te dorë e vogël e Myqeremit,  
te sytë blu të Azbi Seranit.

Ik dhe këput degët e thara...  
Ik dhe zbulo nusët e rreme...  
Hipur në kuaj (gjoja të lirisë),  
hipur në kuaj të Ali bejve.

E shkonin të rinj me pushkë,  
që mbanin kupën e qiejve.  
Dhe rrapi i Dervenit  
ashtu madhështor  
dëgjon Mehmet Shehun,  
teksa dridhen grykat  
e beut i rëndojnë trespiket në dorë.

### XIII

Vinin re e shira  
rreth e rreth krahinës.  
Mes të katër anëve  
rrihte veç një zemër,  
ndrinte veç një diell.  
Sytë e Mallakastrës,  
drejt për drejt me diellin.

Hoqëm bar e gjelbër  
nëpër istikame.



Gurët gjokse mbroje  
vumë si gjerdanë.

Stinë e copëtuar  
nëpër tradhti,  
konturet e tua  
ngjyer kuq e zi.

Pyjet nën diell.  
Pyjet nën yje.  
Pyjet nën helmata.  
Pyjet janë grirë  
nëpër bajoneta...

Ku janë istikamet?  
Në prag të shtëpisë,  
lart nëpër dritare,  
në tokën e shpellave,  
hilqeve dhe marreve,  
në zemër të botës  
ngrihen istikamet...

#### XIV

Në këtë radhë Poçemi  
u bë odë e dëshirave,

ku sofrë jonë u shtrua  
nën oshëtimën e pushkëve.

Ne s'u ulëm si gjithnjë  
nën hijet e gjera,  
po prej tytave të armëve  
do të ngrihej betimi.  
Të porsalindurit  
nëpër thirrje «Vdekje fashizmit!»  
Ata që s'kanë lindur,  
në zemrat e nënave thërrasin:  
«Liri popullit!»

Sot ky Poçëm,  
na u'bë më i madh se dritë e një ylli,  
që ndrin në mëngjes,  
a në mbrëmje ndrin.  
Rrëzohej përtej fjala «Qetësi»  
dhe ngrihej sublime fjala «Betim»!

Të gjitha nuk mund të mbështillen  
në thasët prej xane  
që t'ua kalojmë brezave që vijnë  
as në kanistrën e bardhë.

Ato gurgullojnë kudo.

Kudo.

Fryjnë nëpër vjaska tytash,  
përkëdhelen mbi zhizha shamish.

Fryjnë në istikame,

fryjnë mbi varre.

nën varre.

Kurse ullinjtë gjelbërojnë  
në të katër anët.

Betohemi!

Nën qiellin tonë të grisur  
ku me sytë e lodhur  
shikonim në dhembje  
hambarë të boshatisur.

Betohemi!

Ne që kemi larë sytë në agimet e pastra,  
dhe në ujin e Vjosës së kaltër,  
ne që bukën me kripë e ngjyënim  
dhe na dukej sikur ujët e detit pinim.

Po në themelet e botës së re  
ne do të rriteshim



më të gjelbër se makjet  
dhe ata që do të vijnë pas nesh  
në gjurmët e kuqe  
do nxjerrin mineralet  
Atëherë...

Atëherë...

Po ne përpara kemi malet e përpjekjeve.

Ndaj ngjyejmë 4000 pushkë  
për hakmarrjen.  
Ndaj shtrëngojmë 8000 duar këto çaste  
dhe gatujmë në magjen e kryengritjes  
shpirtin e fukarasë...  
Prandaj me draprin e hënës  
mund të korrin, arat,  
mund të bëjmë gjerdanë  
me fishekë të ndritur.

Betohemi! Betohemi!

Fjalët tona të rënda do të jenë,  
më të rënda se shkëmbinjtë në shpate.  
Mbi kohën që do të bien me furi.  
Mbi kohën do të lënë vragë.

«Vjosa» mes nesh kalon,  
Vjosa gjarpëron në mezhda e shkathët.

«Vjosa» rrudh ballin si relief malor.  
Vjosa mes grykave nis të buçasë!  
«Vjosa» nis të flasë...

Vjosa puth gjymtyrët e Çorrushit me mall.  
«Vjosa» shtrëngon duart e vendlindjes.  
Vjosa këngën e fëmijërisë së kaltër  
e vërtit nëpër gjymtyrët  
e ëmbël, të gjallë.

Vjosa derdh ujërat larg,  
Vjosa transmeton...  
Gëzuar emrin e ri të luftës,  
vendlindja nga zemra  
e buron.

## XV

Nga shkel fashisti,  
shtegton turpi.  
Si t'i përgjigjemi tokës?  
«Luftë! Luftë!»

Na u rritën djemtë,  
na u rritën çapat.  
Ç'këngë do t'u themi vallë?  
«Luftë! Luftë!»

Na u mpinë gjymtyrët.  
Thërrisnin pushkët  
nëpër sytë e brigjeve:  
«Luftë! Luftë!»

Poçemi na mblodhi  
nga larg tufë-tufë,  
kuvendet e lashta thërrisnin:  
«Luftë! Luftë!»

## XVI

Dhe atë ditë i buzëqeshte diellit  
Mallakastra me sy ulliri,  
me flokë makjesh  
dhe me hap të erërave vjeshtore,  
me mollëzat e kuqe  
dhe shamitë e porsalidhura.

Nën strehë të shamive  
nënat prisnin qiellin e perëndimit  
dhe qiellin e lindjes e mbanin mbi kokë.  
Ç'po ngjitej ashtu syve të tyre të thellë?  
Ç'po udhëtonte në shpirtin e detit të tyre?  
Besëlidhja e kuqe ishte mbjellë.



«Mirë se na erdhe, të keqen nëna!»  
«Të kemi pritur përherë».

Po ju pse mërdhini?  
Vendi pse s'ju mban?  
Në korrikun e ngrohtë  
për ju erdhën ngricat,  
për ju, tradhtarë.

Dalngadalë gjarpërinjtë linin lëkurën e tyre  
dhe dilnin lakuriq në sy të botës.  
Dalngadalë ata u ndanë nga turma  
dhe fjala «bej» puqej me fjalën «aga».  
Lumi i Vjosës përplaste brigjeve,  
kërcunjtë e Idrizëve, Kadrinjve, Bektashëve.

Korriku digjte  
dhe shplekste flokët e verdhë.  
Radhë të kuqe shkruante  
në kalendarin e nxehtë.  
Kurse gjarpërinjtë spiunë  
qarkullonin në rrugët me dredha.  
Ne thirrëm të tmerrshëm grykave larg:  
«Në djall të venë!»

## XVII

Mbi hartat rëndonin shigjeta të zeza e blu,  
harta të vizatuara nga duart e huaja,  
që relievin e dashur copëtojnë tej-tëhu.

Cilët jeni ju, gjeneralë,  
që kërkoni mes viseve tona lavdinë?  
Nga vini?  
Ne ju njohim të gjithë...  
Dhe para jush greminat.

Cilët jeni ju, gjeneralë,  
me harta taktike në çanta?  
Me ëndrra të kapitalit  
qepur në grada të ergjënda?

Para jush njerëz me opinga.  
Aty është Bajrami i leckosur,  
dhe Riza Çobani.  
Të gjithëve dielli u futet në porët  
dhe zemrat e tyre janë një me llogoret,  
dhe zemrat e tyre janë në rrënjë ullinjsh.

Dhe zemrat e tyre janë gurgullime burimesh,  
që këndojnë Partinë.

Se grunjërat që ngelën pa korrur në ara  
dhe zogjtë që fluturojnë në shpate;  
drapërinjtë e varur në gozhdë si pikëpyetje  
lajmërojnë luftën e ashpër...

Pesë pushkë, një bombë!  
Pesë pushkë, një bombë!  
Erdhi radha jonë...

Gërshëra e luftës pret konturin e krahinës.  
Gërshëra e bejlereshës i pret fustanit kindat.  
Po në rrugët e gurta  
Villnin plumbat e vdekjes  
autoblindat.

Dhe shushurinë tradhtarët në gjethishte:  
— Ç'bëni kështu?  
Një grusht njerëz!  
Hata!  
Me dy divizione,  
apo jo, Kadri be!  
Ç'na thua, Qazim aga?

Ju mendoni për bukën e pushkët,  
që do mbartni korijeve, lugjeve.  
Ata presin porositë e mëndafshit të nuseve...



O nëna të mira,  
të regjura në mote,  
me datëlindje të harruar  
pranë djemve  
prisni lirinë e uruar.

Sa vjeç ish atëherë Azbi Serani?  
Në ç'rrugë të Çorrushit mendonte me sytë nga  
qielli?

Mendonte për partizanët e ikur  
në rrugën e diellit.

Dhe sytë prej qiellit s'i hiqte Azbiu...  
Në qiellin e kaltër ulërinin avionë,  
në qiellin e kaltër ngriheshin kushtime:  
«Pesë pushkë e një bombë!  
Pesë pushkë e një bombë!»

## XVIII

Netve gjumi u harrua,  
shkojnë e vijnë mes vezullimesh korrierë...

Ushtarët fashistë,  
napolitanë, venecianë

(si legjionarët romakë),  
Shkrepën plumba në brigjet e rreptë  
nga plumbat e tyre  
u vranë vetë.

Kabllot e telefonave të lidhën,  
ti u fute në mes të çudirave...

Urdhrat e mëkëmbësit.  
leshtrat t'i ngritën.  
Prej kurmit tënd  
ai kërkonte hirin...

Dhe kabllot e telefonave u prenë,  
duke i këputur me dhëmbë.  
Ne hymë në legjendë...

Kandilët prej tunxhi ngelën ndezur  
në dogramatë e dritareve.  
Vetëm dy pika vajguri  
dhe bënin dritë pa pushuar netve.

Relievi nëpër tymra,  
nën këmbë të territorialëve,  
që s'kishin kohë të lidhnin plagët.

## XIX

O Vjosë e turbulluar,  
që rrjedh nga malet,  
ku bubullojnë ciklonet!  
Po, unë korrieri i pagjumë  
në vahun tënd vrej t'ecin divizionet.

## XX

Në Gjerbës!  
Në Gjerbës!  
Thirrjet vinin mes zjarrit  
si kosore të mprehta,  
kur tymrat ngriheshin  
si reshje behari.

Dhe ashtu e mbështjell  
në fokusin e dylbive të Mehmetit:  
gjysmë e djegur,  
gjysmë e gjakosur.  
Shikoje sytë e djemve  
dhe vazhdimisht kërkoje fishekë.  
Trupi yt do të qe predha e fundit  
në mes fashistëve dhe vdekjes...



Dhe i buzëqeshje diellit,  
pa menduar shkretëtirën djegëse.  
Ashtu ti do të takoje atë ditë  
vetveten...

Në Gjerbës!  
Në Gjerbës!  
Thirrjet vinin  
dhe përralleve, xinave  
territorialët mbinin.  
Ahet e tyre mbi shenjestra vraponin...  
Në korijet e divizionit.

Qielli yt  
u mbush me avionë.  
Pyjet oshëtinë nga zemërimi,  
luginat nga jehonat.  
Me dhëmbët tanë  
burgjitë u hoqëm bombave...

## XXI

Zjarri digjte.  
Asnjë zë,  
asnjë klithje

dhe gjinkallat pushuan këngën në korije;  
monopateve përpjetë  
ikin grisur e gjymtuar  
divizionet me helmetë.

Në fletëthirrjet e «Partisë  
Mallakastra ishte futur,  
shkonte, mbliidhte municone.

Varg, varg muhaxhirët  
nëpër rrugët e juglindjes,  
prapa si korrier liria  
një nga një i zgjonte shtigjet.

## XXII

«Maqina shtypte gazeta,  
radioja ngritur në një pllakë»,  
hapej nëpër botë lajmi,  
Mallakastra digjej flakë.

Edhe trojet e gjakosura  
vinin buzën prapë në gaz,  
paskej humbur nëpër luftëra  
vetëm Kartagjenë e lashtë...

## XXIII

Një grumbull turtujsh  
fluturuan mbi Fratar.  
Tek-tuk mbaheshin shtëpitë e tradhtarëve,  
ndonëse tendëvidhisura,  
ndonëse të bardha...

Në majë të Gorricës  
një këngë turtujt morën,  
mbi krahët e tyre të larmë.  
Dhe hapet kënga si uguri i bardhë  
nga mali në mal.

Pikon zjarr.  
Djepi digjet.  
Sisa bijës  
nuk i pihet.

Pikon plumb  
nëpër këngë.  
Mblidhni plumbat  
ndënë mëngë.

Mallakastra  
heq shaminë.



Plumbat bëhen  
trendelinë.

## XXIV

Dhe lindën ditë të reja në fshatrat,  
bari buloi në lëndinat,  
korrierët në vallet e popullit  
takonin këshilltarët e krahinës...

Ditë dhe net.  
Net dhe ditë.  
Nëpër ngatërresa stinësh  
udhëve të pafund të kalendarit,  
batalionet e kuqe.

Po traga humbet në luginë të Marushës  
dhe ujërat nuk këndojnë, po ulërijnë.

Mbin «Balli» si kërpudhë  
nëpër të klasës kalbësirë  
edhe vret që pas ferrave  
korrierët partizanë.

Ku ke mbetur vallë, Hasan i vogël?  
Ku të të kërkojmë këtë natë?  
Zëri yt te çeta do këtë shkuar,  
kur t'u këput vrapi nëpër baltë?  
Gjerdheve bre dh qen ballisti,  
udhët kthejnë sytë nga ti, menduar;  
hëna shket mbi istikamet varg  
dhe të puth ballin e praruar.

## XXV

U ngjeth prapë toka.  
Një erë e ligë fryn përsëri.  
Malli na mori për të lashtat e vjeshtës,  
po u duk një armik i ri.

Si t'i linim llogoret të ftoheshin?  
Dhe pushkët s'patën kohë t'i vajisnim.  
Nëpër prefektura,  
dora e çmendur e Hitlerit,  
rrëzoi kokën e madhe të Musolinit.

Bashkë me ta piketat e tradhtisë  
shtegtonin si të marra,  
koka Isa Toskësh dukeshin,

ndërsa fara e Partisë  
rritej si grunjërat e mbara.

Dhe Betktashët, Besimët zgërdhëshin,  
kur nxirrnin nga sënduqet flamurët.  
Pikonin ujërat e qelbura të mendimeve  
dhe vinin erë si hauret.

Ku i keni djemtë dhe vëllezërit?  
Po burrat ku i keni, o gra?  
Presin manushaqet e pranverës,  
presin ditët e mëdha.

Edhe ëndrra shohin përmbi suka  
si Vjosa ia mbledh Povelës meloditë.  
Si nusët e tyre buzë mandileve,  
rënduar nga varricat e druve  
çonin armë dhe letra në pritë.

Dhe motra e tyre hekalase  
mbushte kanistrën  
me fanella e çorape leshi.  
Në kalldrëmin trokiste  
me shojet e sandaleve  
e shpejtë si era.



Po ç'u bënë këshilltarët?  
Pse hesht shkolla e vjetër?  
Djersët e saj pikojnë në kanistër,  
çorapet e partizanëve fëshfërinë.  
Dhe i dridhet zëri motrës në vajtim:  
«O Islam Sadiku!  
O Qerim Jemin!»

Asaj mbrëmje të ngrirë tradhtie  
këshilli i boshatisur  
ëndërronte për dhjetë burrat e lidhur.

Në vend të përgjigjes  
ngrihet një këngë...  
Kënga vesh fanellat partizane  
dhë ngjitet në male.

Seç u vranë dhjetë burra në Hekal.  
kodrat morën plagët zhur.  
Djemtë morën pika gjaku  
për të ngjyer flamurin.

Brigjet morën prapë parmendat  
dhe në ploret vunë mina.

Grisen palltot nëpër dimër  
që të lidhnin dhembjen.

Seç u vranë këshilltarët!  
Kohë e kuqe gjak!  
Fryn erë e qep flamurë.  
Ha barut e lind fëmijë.  
Vijnë prapë varganë-varganë  
këshilltarë të rinj...

More burra të dhjetorit,  
shihni fshatrat me radhë!  
Bijtë tuaj kositin bar,  
Duke vrapuar në luftë,  
shqelmojnë helmetat e huaja  
rrokullisur udhë më udhë.

Ju ikët,  
çel dafina.  
Bisqet rriten,  
shkon pranvera.  
Te Dervishi në brigadë  
malet dridhen nëpër krisma  
dhe nga dhembja jo më pak.

Ku jeni, o këshilltarë,  
që s'na erdhët më në mbledhje?

Zgjatni duart anës Vjosës,  
futni grushtet e djersitura.  
Mbani vesh ç'thonë luginat,  
pranë buzëve të zhuritura.

Shkruan Partia proklamata.  
Vrapojnë letrat si pëllumbat,  
ju te shkollë e Gorishores  
rriteni nën shinë e plumbave...

Edhe ngriheni pastaj,  
shkoni larg në Mal të Zi.  
Hapni udhën dimërore  
në operacion të ri.

Fryn erë në Golik,  
fryn erë në Mallakastër.  
Ne ju ndjekim përsëri,  
në mendimin tuaj të pastër.

Kodrave të murrme hiqet  
dhe zvarriset tradhtia.



Seç po djeg e po zhurit  
këngë e viseve të mia...

## XXVI

I kalova tej përtej të nënta brigjet.  
Pashë nusët tek hapnin letrat...  
Pashë nënat me sëpata të mprehta.  
Pashë batalionet nën breshër,  
tek zbrisnin si lumenjtë.

Dhe nënat ndalën krismat,  
dhe nusët ulën shtambat;  
i pihej ujë komisar Matohitit  
nga plagët e rënda.

Këngë e viseve të mia  
po vjen e mblidhet rreth bilbilit  
e bëhet strall me çika Kurveleshi,  
bëhet grurë në mendimin e tij,  
bëhet diell në sytë e tij.

Muço Matohiti,  
sa të ngrohtë e paske

kraharorin tënd,  
gjaku kaq i vakët  
ra nën kala.

Muço Matohiti,  
syri seç të ngeli  
në brinja, në ara.  
dora është shtrirë:  
«Përpara! Përpara!»

Baltën shqiptare  
nëpër duar shtrëngon  
dhe sërishmi ngrihesh,  
përpara marshon.  
Hyri prilli, shkriu bora majave...  
Kur çelën manushaqet  
buzë shkëmbinjve,  
ti doje t'i këpusje tufa-tufa,  
motërzo.  
dhe t'u çojë vëllezërve...

Po ata në brigadat partizane  
pinin ujë në gjurmë mushke

dhe shikonin me çudi dëborën e Korabit,  
kur në Mallakastër çelnin manushaqet!

Hyn prilli, shkërin bora majave,  
dhe gruri përsëri nuk bleri.  
Në tingujt e borisë së Haki Kapajt,  
në breshëritë  
e mitralierit Ismail  
hapeshin arat në ballë të erës  
dhe rriteshin kallinj të.

## XXVII

Mallakastra s'prodhoi bukë.  
Po mallakastra prodhoi luftë.  
Ditët që ia mori hua lufta,  
do t'ia kthejë pastaj liria...

Dhe erdhën ca ditë, more shokë,  
kur gëzimi u spërkat me lot të vakët;  
kur sheshet u mbushën me eshtra dëshmorësh  
në breg, në qafë, në brinjë!  
Ca varre të shpejta  
lumjanësh,  
lebërish,  
devollinjsh.



E qenë ca ditë, more shokë,  
kur armët u afruan te parmendat,  
kur komunistët bridhnin lagjeve, shtëpive,  
duke ndjerë plagët e rënda...

Dhe të rinjtë rreshtoheshin përsëri  
në batalionet e sulmeve,  
Mallakastra e lirë u puthte ballin  
e kundërmonin varret prej luleve.  
Në shtëpitë tona kish ardhur pranvera,  
po ne u drodhëm për Dervish Hekalin.  
Ai mes brohorimave në Symizë u shfaq,  
në mademet e ndërtimeve të ardhme,  
në mademet e luftës së gjatë...

Nga cilët gurë të ta bëjmë përmendoren,  
vëlla?

Nga Shkëmbi i Kavajës,  
nga Gradishta jote e dashur,  
apo nga Kuçi lab?  
Përmendoren tënde kala.

Ku ngelën Shefiti e Ramizi,  
vëlla?  
Ku shkruan vjersha Dino komisari?

Mehmeti po rrudh ballin në meting.  
A do të vijmë në festat e lirisë?  
A do të pijnë ujë të ftohtë në krua.  
A do t'i marrë malli për Poçemin  
dhe për erërat që vërsëllesh në Symizë?

Thërrasin që të nënta brigjet!  
Do të vijnë,  
do të vijnë!

## XXVIII

Tani zgjatma krahun tënd, Vjosë shtegtare,  
të vadis brigjet veshur makje,  
të vadis pemët e të mbjellat,  
t'u lidh shallin tënd të kaltër  
nëntë brigjeve që s'i merr kurrë gjumi...

FUND

1970-1973

Kopertina nga Svetllana Strazimiri

Tirazhi 1.000 kopje      Format 70x100/32      Stash: 2204-72

---

Shtyp. Drejtoria Qendrore Poligrafike  
Shtypshkronja «8 NËNTORI» — Tiranë, 1974